

陶雲汀先生奏疏

奏疏卷四十三目錄

江督稿

安化陶

微湖水逾定制啟放蘭家山壩摺子

覆奏詢明秦繩曾兄弟子嗣摺子

各岸銷鹽考覈請免開揭摺片

軍政請展限辦理摺片

懇請撥發工需銀兩摺子

恭報回省趕辦武闈摺片

趕赴清江籌議河道情形摺片

緝獲挖堤要犯飭解審辦摺片

恭謝

欽頒平定回疆勦擒逆裔方略摺子

續獲它堤要犯摺片

請上江滯銷食鹽融銷楚岸摺片

于家灣挑河分數蠲工興築日期摺子

大工例外支用銀兩請照舊覈扣摺片

堵合各壩及洪湖水誌消落日期摺片

駱馬湖灘地被淹請緩徵摺子

查明江蘇尙無阻礙水道沙洲摺子

續獲它堤要犯解浦審辦摺片

緝獲護私抽費逃犯飭審摺片

微湖水逾定制啟放蘭家山壩摺子

奏爲東省微湖水勢長逾定制江南銅

放蘭家山壩日期竝水勢下注情形恭摺覆

奏仰祈

聖鑒事竊臣等於閏九月初八日承准軍機大臣字

寄閏九月初三日奉

上諭據吳邦慶奏東省微山湖水長較道光二年異漲爲尤大東境減水各路久經全啟仍屬有長無消請啟放蘭家山壩以資分洩等語蘭家山壩道光二年經江南山東兩省會奏此後如遇微山湖

盛漲一面咨明江省卽委員前往挑啟現在湖水
截至九月二十一日已積長至一丈八尺九寸五
分如遇西風則石工危險東風則土工汕刷處處
堪虞著陶澍等勘辦如近日湖水仍未消動應否
趕啟蘭壩以洩盛漲於兩省運道民生有無裨益
竝體察情形相機妥辦是爲切要欽此伏查銅沛
廳屬蘭家山壩原係微山湖尾間減洩漲水之
路水由荆山橋河歸入邵宿運河臣等於未奉
諭旨之先疊准河東河臣吳邦慶咨會微山湖水截
至九月十一日已長至一丈八尺七寸五分較

之道光二年盛漲爲尤大一線單堤勢難容納而豐沛魚臺一帶民田亦多被淹咨商啟放蘭家山壩以洩湖漲竝准東河臣山東護撫臣先後附片具

奏咨會前來臣等以微湖存水較大東境各閘壩旣已全行啟放仍在漲滿堪虞自應另籌宣洩惟蘭家山壩工多年未啟壩下河道恐有淤墊卽飭徐州道督同銅沛廳查照成案勘估挑河築壩盤頭竝廂護埽等工詳慎辦理旋據署邳州知州黃耀明稟以紳士公呈邳境地勢低窪

今歲二麥被旱秋禾又被雨水淹浸恐啟蘭家
山壩水勢全注被災更重等情正在查辦間接
據徐州道稟報該壩應廂裏頭護埽及鉗口壩
竝壩下疏挑河道加培攔堰等工仿照道光二
年啟放之例業已一律如式趕辦完竣卽於閏
九月初一日午刻啟放過水臣等伏思該壩高
下懸殊下游河道窄狹應防出槽溢漫海沭邳
州等處民田或有受淹且恐中運河絳道隄工
著重當又飛飭徐州道察看情形據實稟覆以
憑覈辦茲據徐州道李國瑞稟稱該壩下注之

水由茅村橋荆山橋泉河直達運河尙未出槽
普漫無礙下游民田邳宿運河閏九月初四五
日其止長水二寸亦非猛驟回空漕船不致阻
滯等情臣等仍恐啟放日久微山湖水消耗過
多致誤來年重運咨明河東河臣山東撫臣派
令委員查驗湖水見消二三尺卽先行來江會
同堵閉其餘東境分洩之處就近酌量辦理以
昭慎重所有啟放蘭家山壩日期並水勢下注
情形理合恭摺具

奏伏乞

皇上聖鑒謹

奏

道光十二年閏九月十九日具

奏十月十一日奉到

硃批知道了欽此

覆奏詢問秦繩曾兄弟子嗣摺子

奏爲遵

旨詢問明確據實覆

奏仰祈

聖鑒事竊臣於揚州途次承准軍機大臣字寄道光
十二年九月十四日奉

上諭原任翰林院侍講學士加三品卿銜秦承業之
子候選員外郎秦繩曾前經回籍是否仍來京當
差併該員有無兄弟子嗣著該督卽行詢問明確
據實覆奏等因欽此當經轉行江寧藩司趙盛奎

面加詢問竝函詢秦繩曾去後茲據藩司趙盛奎詳稱謹卽面見秦繩曾恭傳

聖諭秦繩曾跪聽之下卽伏地碰頭感泣難以言狀據稱繩曾於道光元年隨侍原任翰林院侍講學士加三品卿銜故父承業回籍時故父年已七十六歲例應在籍侍養嗣於八年丁父承業憂十年服闋因患怔忡兼腿痛之症時愈時發延今未能起程赴京當差繩曾向無兄弟亦未有子嗣惟故父承業在日有將繩曾胞伯承恩第四子象曾繼爲次子之議屢囑繩曾俟年屆

六旬無子卽照議舉行以廣嗣續本年繩曾已六十歲現在遵照父命辦理象曾係監生曾應鄉試二次現年二十七歲伊已舉兩子其次子榮照已繼與繩曾爲子可冀宗祀不墜以成故父之志渥蒙

聖恩垂詢謹將繩曾因病未能赴京及兄弟子嗣詳悉陳明等情竝據秦繩曾呈覆前來理合遵

旨據實覆

奏伏乞

皇上聖鑒謹

奏

道光十二年閏九月二十一日具

奏十月十七日准

軍機處知會貴督具奏前事一摺奉

硃批另有旨欽此摺畱本處備要爲此知會

各岸銷鹽考覈請免開揭摺片

再兩淮各口岸銷鹽例應按年計數

奏報考覈分別缺溢議處議敘道光十一年分各岸銷數除湖廣省缺銷不及一分較上三年已增暢旺外江南江西等省均因異常大水商運艱阻民間因災困乏銷售無多河南省各岸又因北商極疲運絀惟藉官鹽接濟銷數更缺據鹽道及各州縣詳稟前來臣確加覆覈係屬實在情形查向來缺銷有因之口岸歷經鹽政

奏蒙

恩准免議在案上年江南江西均因水災民商交困
河南省亦因商運久懸以致仍前缺銷竝非鹽
道州縣督銷不力應援照向案請

旨俯准將江西鹽道及江南河南各州縣道光十一
年銷鹽考覈一體免其開揭議處出自

天恩至本年淮北改行票鹽其滯岸自七月以來截
至閏九月初旬四箇月之內已請運十五萬引
較原額九萬有餘之數已多逾半倍販買雲集
轉運流通海屬災黎藉資傭趁閭閻歡謐現在
雙金關未閉中河水勢下注直達鹽場舟行甚

便計至冬初尙可多運引張查淮北鹽務現係更改章程初次試行將來考覈缺溢章程未便照商運舊例辦理應俟試行一二年後察看情形另行酌議具

奏以期覈實除一面督飭運司查明上年各省實銷數目咨部備覈外所有道光十一年兩淮缺銷有因各口岸循案請免考覈及現在票鹽暢行各緣由謹據實附片縷陳伏乞

聖鑒訓示謹

奏

道光十二年閏九月二十一日具

奏十月十七日奉到

硃批另有旨欽此同日奉到十月初三日內閣奉

上諭陶澍奏兩淮各口岸銷鹽缺額上年江南江西均因水災民商交困河南省亦因商運久懸以致仍前缺銷尙非督銷不力等語所有江西鹽道及江南河南各州縣道光十一年銷鹽考覈均著加恩免其開揭議處至本年淮北改行票鹽其滯岸自七月以來截至閏九月初旬已請運十五萬引較原額多逾半倍淮北鹽務現係更改章程初次

試行將來考覈缺溢章程未便照商運舊例辦理
著俟試行一二年後察看情形酌議具奏以歸覈
實欽此

軍政請展限辦理摺片

再本年屆當舉行軍政例於十月內具

題伏查軍政考績黜陟攸關必須詳細覈實考察

臣前於江西省城查閱營伍接奉

延寄折回清江查辦決口要案十月卽值武闈屆

期臣例應監臨典試所有三省軍政十月內不

克趕副例限相應

奏懇

聖恩俯准展限一月俟武闈事竣補辦軍政於十一

月內再行會同江蘇江西安徽撫提諸臣彙覈

具

題俾得詳慎考察以副激揚

鉅典理合附片奏

聞伏乞

聖鑒謹

奏

道光十二年閏九月二十一日具

奏十月十七日奉到

硃批依議該部知道欽此

懇請撥發工需銀兩摺子

總河會稿

奏爲遵

旨估辦吳城七堡以上正河高仰大加挑濬需用銀兩懇

恩勅部議撥以資趕辦仰祈

聖鑒事 臣等於閏九月二十日承准軍機大臣字寄道光十二年閏九月十三日奉

上諭據穆彰阿等奏會勘河湖運道情形並妥籌辦理事宜一摺覽奏及圖均悉現在桃南決口黃水入湖從吳城七堡仍流入黃凡外南北下汛及山

海兩廳百餘里已刷滌漸深而吳城七堡以上高
仰如舊卽在桃南北下汛外南北上汛之間計程
二十餘里現當正河乾涸必須趁此機會著張井
佑辦抽溝大加挑濬俾禦黃壩以上漸就底平此
爲至要等因欽此又閏九月十四日內閣奉

上諭現當正河乾涸正好估辦約計所費不過四十
萬兩著陶澍張井相機妥爲籌辦等因欽此恭誦
之下仰見我

皇上聖明燭照

指示機宜感佩交縈莫能名狀臣等伏查吳城七堡

以上爲歷來高仰之處亟思除去而無從措手
茲值河流乾涸之際挑濬易施趁此興工可期
事半功倍前次臣陶澍會同尙書臣穆彰阿勘
視之後卽經臣張井遴委淮海道文麟河營叅
將張兆帶同熟諳估計員弁自新築攔河壩起
至外北廳屬仲工以上止按段丈量計長四千
二百二十五丈自河頭至河尾估挑寬深不一
內有稀淤五萬六千八百餘方積水四萬八百
餘方所有方價照挑河深淺竝稀淤治水各項
覈實分別計算約需銀四十萬兩以內現在天

陸雲汀先生集疏證四三
氣晴和人夫得力趕緊估挑於春水未生之前
竣工將來隄成放水可期黃流迅暢不至停淤
於全河實有裨益惟河庫現無存款惟有仰懇
天恩勅部籌撥銀四十萬兩迅速解工臣等再加意
撙節估計務期省之又省總不出四十萬之外
仰副

聖主慎重河防工歸實用之至意所有估需銀數懇
請撥發緣由謹合詞恭摺具

奏伏乞

皇上聖鑒再此案工關係要若俟撥項到日再行派

辦實恐緩不濟急臣張井未敢拘泥先行設法
騰挪借撥按段分工卽行償辦合併陳明謹
奏

道光十二年閏九月二十二日具

奏十月十九日奉到

硃批另有旨欽此同日奉到十月初五日內閣奉

上諭陶澍等奏挑浚高仰正河懇請撥款趕辦一摺
前因桃南決口黃水入湖從吳城七堡仍流入黃
凡外南北下汎及山海兩廳百餘里已刷滌漸深
而吳城七堡以上高仰如舊卽在桃南北下汎外

南北上汎之間計程二十餘里已降旨交張井趁此正河乾涸估辦抽溝大加挑浚茲據該督等查明自新築攔河壩起至外北廳屬仲工以上止按段丈量計長四千二百二十五丈約估需銀四十萬兩以內著該河督卽行鳩集夫工趕緊估挑務於春水未生以前一律挑竣庶堤成放水黃流迅暢不致停淤其所請籌撥銀四十萬兩著戶部速議具奏欽此先於道光十二年十月十六日准

戶部咨議覆請撥挑浚高仰正河要工自應准其如數動撥

臣

等酌議擬撥本年秋撥現報之

浙江地丁銀一十萬兩白糧銀一萬兩兩浙鹽課銀四萬兩蘇州歸還原借封貯銀一十五萬兩再撥蕪湖關約徵稅銀一十萬兩以上共撥銀四十萬兩應令各該撫監督等於文到日迅卽派委委員解赴河庫以供支用仍責成該督等將前項撥給銀兩轉飭樽節動用竝令於造報工部覈銷時欽遵前奉

諭旨將前項請撥銀兩有無餘剩及餘剩若干專案咨報臣部備查以昭覈實等因奉

旨依議欽此

恭報回省趕辦武闈摺片

再者本日

欽差尚書臣穆彰阿已起程北上臣陶澍因武闈在
卽趕緊回省辦理鄉試各務臣張井亦卽赴桃
源工次確切勘估順赴運河一帶履勘運道隄
工合併附陳伏乞

聖鑒謹

奏

道光十二年閏九月二十二日具

奏十月十九日奉到

硃批另有旨欽此先於十月十三日准

軍機大臣字寄十月初五日奉

上諭本日據張井奏尙書穆彰阿已起程北上陶澍
因武闡在卽趕緊回省辦理鄉試事務等語昨因
要犯陳端等未獲降旨令穆彰阿折回清江浦俟
拏獲首犯陳端等辦結後再行回京陶澍一面飭
屬嚴拏要犯陳端等務獲交穆彰阿審辦一面趕
緊辦理武闡事務揭曉後仍卽赴清江浦會同審
訊可也將此諭令知之欽此

趕赴清江籌議河道情形摺片

再臣接奉閏九月二十九日

諭旨令

臣赴清江會同穆彰阿張井將朱士彥所奏

桃北改河一摺併嚴烺書信各件詳悉履勘籌議等因伏查朱士彥所奏全黃入湖湖內被淤下河危險各情形均係龍窩汛初決口時所聞臣彼時遠在江西相隔二千餘里所慮正復如此迨會同穆彰阿往勘始知桃源縣境共計四十八圖分隸黃河南北兩岸南岸堤內共有二十圖均係民田廬舍相距洪澤湖邊尙遠祇因

連年湖水漲漫多被淹沒水退時始得還居百姓深以爲苦本年湖水長至二丈一尺爲從來所無各村圖宛在水中趙步堂陳堂陳端陳欽張開泰海東樓等均有田在水內陳端與陳堂因而起意商衆挖堤放水淤地該犯等本係生監各有身家竟敢於犯法可惡已極溯查道光二年五月卽有阜寧縣監生高恒信貢生張廷梓等因田被水淹兩次挖堤糾衆三十餘人執持鐵鞭圍住巡兵及百總楊榮硬將陳家浦四壩堤工澈夜挖通過水楊榮乘間覓水始得脫

身賊集河員兵役挈獲各犯照例問擬軍徒其
克頑情節相似而本年黃水盛漲決口未能堵
合情形更重計其時湖水先已漲抵堤邊黃流
驟入幸有清水頂托不能灌入湖身淤泥所及
恰在被淹各圍境內迨吳城七堡禦黃壩順清
河等處放水黃流傍堤根而東仍入正河暢刷
沙泥現在黃河正可稍望轉機改河或可不必
且查嚴垠所致朱士彥之信似亦因桃源下游
至禦黃壩一帶河身高仰有中滿之患湖水不
能暢出刷河以致淤積日高而又人力難施無

處熬壩放黃以施挑切之工故爲此展轉避就
之計欲從桃北另開新河至安東境內仍歸正
河使漕船從南岸東下渡河逆流牽挽至桃北
以上入運約費三百餘萬計程一百數十里旣
非計日可成且所深不過三四尺又無清河刷
滌難保不日久亦淤查自龍窩汛決口以後黃
河正身業已涸出恰在桃南桃北境內經臣等
會勘請自吳城七堡以上至于家灣二十餘里
趕估挑浚卽此段河身高仰之處也除此中滿
之患下流刷滌漸深一俟決口堵合堤工完竣

黃河仍歸故道行走比之桃北另開生河較爲
妥便即使清水偶歉仍可倒塘灌運若改河之
事道遠費重難處甚多必須逐細履勘方能置
議現在挑河築堤亟須趕辦未便觀望遷延臣
因考試武闈俟三兩日闈事揭曉卽趕緊前往
會商所有接奉

諭旨籌議河道情形併趕赴清江緣由謹先附片覆
奏仰答

宸廑謹

奏

道光十二年十月十四日附片具

奏十一月十二日奉到

硃批覽欽此

緝獲它堤要犯飭解審辦摺片

再桃源縣奸民它堤一案經臣陶澍會同穆彰阿將河營弁兵緝獲之孫在山該府縣緝獲之劉開成張開大海東樓趙步堂陳明等十餘犯分別審擬具

奏在案惟首犯陳端陳堂及陳光南陳欽未獲疊經臣等分飭該管之河標營汛及本省地方官並咨鄰省各處一體嚴緝務獲茲據淮安府知府周燾署桃源縣知縣徐麟趾革職淮安府通判前署淮安府知府塔克興阿稟報飭捕購線

派撥幹役同家丁四路躡緝至泗州雙溝地方
於十月初三日將要犯陳堂挈獲竝據革職遊
擊三音特古斯稟同前因又據署安徽泗州直
隸州王恩植稟稱疊奉劄飭勒挈決堤逸犯前
據盱眙縣知縣余君壽稟獲窩畱之甘二等竝
獲來安縣之雷林芝等究出陳端踪跡派役跟
緝茲於十月初六日在州境崔家集地方將案
內要犯陳欽挈獲有營兵及桃源縣役同獲解
案訊據陳欽供認聽從海東樓糾同陳端陳堂
陳明陳光南孫在山等決堤放淤屬實伊與陳

堂陳端三人同逃旋經分路各跑陳端因有表
親曾做過山東東阿縣袁杰之子袁雙官現在
寄居東昌府城外本是桃源人投奔前去等語
除飭將陳堂陳欽二犯解案從嚴審辦一面派
員追緝陳端等務獲竝飛咨山東巡撫轉飭東
昌府一體嚴密查拏外所有緝獲要犯陳堂陳
欽飭解審辦緣由合併附片具陳伏乞

聖鑒謹

奏

道光十二年十月十四日附

奏十一月十二日奉到

硃批另有旨欽此同日准

軍機處片開貴督等片奏一件奉有寄信

諭旨交山東巡撫鍾昌密速查拏矣爲此知會

恭謝

欽頒平定回疆勦擒逆裔方略摺子

奏爲恭謝

天恩仰祈

聖鑒事頃臣奉到

欽頒平定回疆勦擒逆裔方略一部謹卽恭設香案

望

闕叩頭祇領欽惟

皇上思文光被

聖武懋昭

隆七德以宣威恢宏

駿績

攬九功而敘事焜燿

鴻編戰紀八圖

算先十策蓋止戈爲武撻伐皆

廣運之神斯保大定功

制作極

憲章之燬方道也略法也一自

奎文揭示光華炳著以千秋

謨顯哉

烈承哉仰惟

祖武克繩史籍昭垂於百代蠢茲霍集占之回孽乃有
張格爾之元兇假和卓以率羆貔花門嘯聚結
浩罕而爲狼狽蔥嶺橫行紀本妄干辜由自速
我

皇上幾操指掌

命策股肱九天九地之師四正四奇之略霆驅電掃
地水貞符雪沃冰摧天山唱凱紅旗飛處獻泮
則鐘鼓流音白組牽來

告

廟而馨香

舉典上

慈闈之

徽號懿矣

尊親銘冊府之勳庸煌茲帶礪四十人

閣光繪紫旅肅琫弓百千仞山色鑱青

詩標鐵蓋凡此

膚功之迅奏悉緣

帷畫之周詳允宜大一統而作春秋善後匪同於戊

己尤喜奉重編而稽歲月承

先恰紀乎庚寅

製仰同文體由

獨斷臣未親敵愾獲睹編摩定識花牛打坂之遐荒
無遠勿屈况際白犬搖民之販嚮連類堪書料
有萬全遺無一矢

天之所助者順也知

盛世服以心誠兵不得已而用之惟

聖人情由辭見八十函臨風盥誦莫贊

高深億萬禩就

日忱輸長殷頌禱所有臣欽感榮幸下忱謹繕摺恭

謝

天恩伏乞

皇上聖鑒謹

奏

道光十二年十月二十七日具

奏十一月二十三日奉到

硃批覽欽此

續獲挖堤要犯摺片

蘇撫會稿

再桃源挖堤一案續獲要犯陳堂陳欽二名究出陳端逃往山東東昌府袁雙官家隨即派員追緝竝飛咨山東巡撫嚴拏先經附片

奏明在案伏查此案從犯多名其爲陳端轉糾黨羽者惟張開泰趙步堂二人俱已早經獲案併獲隨同挖堤從犯劉開成等十三名惟尙有陳端陳堂陳欽陳光南及不識姓名等犯在逃未獲屢經嚴飭查拏茲續獲陳堂陳欽供出姓名卽經該府縣等拏獲范洪起王聿貴張前朗陳

三啞叭于振祿左克勤張蘭于二田寶敬于未子等十名統計前後挈獲要從各犯共二十七名其首犯陳端據淮安府及桃源縣稟稱密派丁役馳抵山東查係竄往東平州當將袁雙官挈獲解州訊問據供閏九月十八日陳端在伊家住宿一夜卽起身赴濮州武家莊武侑子家又要赴鄆城劉家口糧食行等語而陳堂則供稱陳端係赴濮州城外史家集吳家大莊找吳振川兄弟現又添派文武員弁按照袁雙官陳堂所供陳端逃匿處所分投掩捕併聞河南省

虞城縣地方亦有劉家口市鎮復經飭委踰緝
務期速獲斷不任其漏網至續獲之陳堂現在
供認係桃源縣生員本名陳鏞該管教官例有
失察處分應俟審明定案時照例叅處臣陶澍
因武閘甫經竣事於二十日自省起程適值連
晨風雪現在起程前進除俟到浦後會同穆彰
阿嚴行審訊照例定擬外所有續獲挖堤人犯
併趕緊勒挈逸犯緣由理合附片具

奏伏乞

聖鑒謹

奏

道光十二年十月二十七日具

奏十一月二十三日奉到

硃批知道了欽此

請上江滯銷食鹽融銷楚岸摺片

再淮南食鹽各岸每綱額引素稱滯銷其間寧國上江額引最多尤爲壅積向非融銷綱地卽減折運行歷經辦有成案上年辛卯開綱時已運在途及存倉未售各殘鹽積壓甚多加以夏秋大水各岸被災民間用鹽較少愈加壅滯本年辛卯綱

奏銷後雖據各商將正項錢糧陸續完納將竣而鹽尙未銷後鹽卽難重捆必須另籌疏通之法以免積壓又壬辰綱鹽科則前因帶徵閏月利

銀及酌帶倉穀等款較之上綱辛卯業已加重亦須量予調劑以輕成本而利轉輸現查湖廣口岸銷數正旺應卽循照歷次成案將壬辰綱寧國等岸食鹽二十三萬餘引全行融楚責令請辦壬辰綱商各按正帶融銷食引仍照現綱科則均勻攤納每引應完銀二兩八錢三分三釐零與額定課款無缺且楚西各商運食銷綱免完陞課更可將壬辰科則扯輕得與上綱相等辦運自更踴躍實爲一舉兩便至漢岸現據湖北鹽道詳稟截至本年閏九月止存岸未售

及開行在途鹽船統計僅止十餘萬引亟須接濟是湖廣此時可受融銷無虞佔礙據陞署鹽運使俞德淵詳請具

奏前來理合附片陳明伏乞

聖鑒謹

奏

道光十二年十月二十七日具

奏十一月二十三日奏到

硃批覽欽此

于家灣挑河分數壩工興築日期摺子

總河會稿

奏爲桃南于家灣以下正河挑有成數卽將壩工分別興堵恭摺奏祈

聖鑒事竊照桃南廳龍窩汛于家灣缺口原擬十月二十三日進占興築嗣因正河插鋤以後連遇陰雨尙無挑成分數壩工不得不稍遲數日經臣等竝會同尙書

臣穆彰阿先後具

奏在案查十八日以後天色放晴雖仍間日遇雨併於二十三二十五等日又各得雪數寸而雨止雪霽竝未連陰

臣等卽嚴飭催工道廳督令

挑河各員乘時加緊迅速趕挑不任藉詞延緩
截至現今止按所出土方多寡牽計共有二分
餘工程仍嚴催各分趕照所估河底一律挑成
子河俾雨水得有所歸則兩腮大工即可隨時
併力挑挖竝以此次挑工專爲力除中滿之病
恐人夫因僨工緊急或有移椿墊崖各積弊復
責成催工道廳按日按段上下巡查臣張井復
隨時稽察有弊卽懲務於迅速之中不任稍有
偷減其兩壩正雜各料先經分投購運現已陸續
到工收有成數謹卽於十一月初二上吉之

日調集在壩文武各員虔祀

河神督率兵夫動工興築緝量口門寬一百九十二丈現已於口門兩頭舊堤外越築東正壩基長三百三十五丈西正壩基長二十一丈各寬十二丈全河溜勢仍注東壩卽行捆船進占西壩前水勢稍淺應先創槽盤底層層裹廂俾此後溜勢刷深跟廂較易茲擬正壩廂寬六丈上水邊埽廂寬四丈將來口門收窄溜勢擡高壩下究有湖水頂托建瓴之勢不致過於懸殊吃重應毋庸再廂下水邊埽以歸撙節西壩以上

應築挑水壩以蓋正壩並逼令中泓大溜直注
新挑河頭以成吸川之勢現距西壩以上三十
二丈處所勘定壩基築長十一丈五尺寬六丈
亦卽掘船進占同時廂築如得天時晴霽挑工
早完計期年內定可堵閉合龍其稽蔴價值歷
屆黃河大工因需用較多購辦不易皆於例外
請增臣等因當經費支絀之時事事力求撙節
仍按桃南廳現行漕規照例發辦挑土方價每
方二錢五分至三錢四分淤土每方四錢五分
五釐至四錢九分二釐五毫不獨較歷屆大工

大有節省卽較道光六年王營減壩亦尙有減
無增惟挑工兩頭攔壩先築後起及搶挑河頭
併挑工完竣配平河底展寬加深各工應俟屆
期發辦總期於

奏定挑河四十萬以內銀數趕辦完工不致再有
增多卽廂築壩工亦當於臣張井原請銀數節
慎辦理斷不敢稍任浮糜亦不敢稍任草率除
挑工續有成數進占得有丈尺再行隨時

奏報外所有于家灣挑河分數及壩工興築日期
理合繕摺具

附錄卷之三
奏伏乞

皇上聖鑒謹

奏

道光十二年十一月初二日具

奏十一月二十三日奉到

硃批知道了欽此

大工例外支用銀兩請照舊核扣摺片

再查歷次辦理大工例外支用如薪飯犒賞油
燭紙張棚廠船隻等項爲數不少向於各工員
領項內每銀百兩扣銀二兩作爲公費歷經奏
蒙

恩准此次于家灣需用經費據管理總局道員等稟
請照舊核扣謹查照歷屆成案附片具

奏其所扣銀兩仍飭節省支發如有不敷於通工
現任知縣通判以上各員攤捐津貼不使藉口
浮糜亦不致牽動正款合併陳明謹

奏

道光十二年十一月初二日附

奏十一月二十三日奉到

硃批覽欽此

堵合各壩及洪湖水誌消落日期摺片

再揚河廳高郵四壩自山盱兩壩堵合後卽已
分手搶堵旋據報五里中壩於十月初五日堵
合南關大壩南關新壩及車邏壩於初八十五
二十一等日堵合各澆後戩以資靠衛其揚糧
廳昭關壩先經堵合後戩亦已跟澆下河田畝
均經涸出不致有誤春耕堪以上紓

宸厯山盱仁禮兩河於初十及二十六日先後堵閉
斷流均卽趕澆後戩察看洪澤湖水誌截至十
一月初一日消存一丈七尺一寸較盛漲已消

四尺八寸不容再任分洩歸江卽飭將義字河
接手趕堵以期湖水全出清口專力刷淤合併
附陳謹

奏

道光十二年十一月初二日附

奏十一月二十三日奉到

硃批覽欽此

駱馬湖灘地被淹請緩徵摺子總河會同

奏爲宿遷縣駱馬湖灘地上年被淹歉收應徵租
息懇

恩分別緩徵以紓民力仰祈

聖鑒事竊照宿遷縣駱馬湖無糧灘地經前督臣等
定則徵租爲淮徐二屬地方公用聲明倘遇水
旱災傷一體覈實勘豁

奏奉

諭旨照議欽遵續於道光八年經前督臣蔣攸銑以

湖地被災總須委員確勘必如六年之全無麥

收方准請豁如止歉收卽酌量緩徵不能概請
蠲免附片

奏明各在案道光十一年據宿遷縣知縣李萬倉
稟報該湖灘地被淹二麥受傷當經臣陶澍查
案批飭藩司委員查勘嗣據徐州府飭委邳州
會同該縣查勘該湖灘地因十一年春雨過多
灘地久淹所種二麥收成甚少歉薄居多聲請
分別緩徵其緩徵租錢自道光十二年麥收後
起分作二年帶徵等情稟經藩司覈查恐有不
實駁飭再行確勘去後茲據江甯布政使趙盛

奎詳據徐州府復飭該印委各員勘得該湖地
分十段除第三九十各段尙屬有收與各段草
則地畝毋庸查辦外其第一五兩段地極低窪
被淹最重租錢應請全行緩徵第二四六七各
段被淹稍次收成歉薄租錢酌緩十分之五第
八段情形更次酌緩十分之二其緩徵租錢卽
從道光十二年麥收後起分作二年帶徵取具
緩徵冊結委員出具勘結由該管道府覆勘加
結移司呈請具

奏前來 臣等覆查駱馬湖灘地本係坐落極窪之

區向止播種二麥歲僅一收去春連遭陰雨河水停積該地被淹各段收成實屬歉薄若仍一律照常催徵民力實有未逮既據確切查勘酌分緩徵分數合無仰懇

天恩俯准將該湖灘地十一年分應徵湖租分別酌緩以紓民力所有各段緩徵租錢共計四千五百六十五千二百七十文自道光十二年麥收後起分作二年帶徵尙有應徵租錢一萬四千四百餘串足數年例支用除將送到冊結咨部查照外謹會同江南河道總督臣張井合詞恭

摺具

奏伏乞

皇上聖鑒謹

奏

道光十二年十一月初四日具

奏十一月二十八日奉到

硃批另有旨欽此同日奉到十一月十七日內閣奉上諭陶澍等奏灘地上年被淹歉收請分別緩徵二摺江蘇宿遷縣駱馬湖灘地上年因春雨過多二麥收成歉薄既據覆勘明確自應量予恩施加恩

著照所請所有駱馬湖灘地應徵道光十一年分
租息內第一五兩段被淹最重著全行緩徵第二
四六七各段被淹稍次著緩十分之五第八段情
形更次著緩十分之二其各段緩徵租錢共計四
千五百六十五千二百七十文均自道光十二年
麥收後起分作二年帶徵該督等卽刊刻謄黃徧
行曉諭務使小民均霑實惠毋任吏胥侵蝕以副
朕軫念災區至意該部知道欽此

查明江蘇尙無阻碍水道沙洲摺子

蕪撫會稿

奏爲查勘江寧蘇州各屬沙洲尙無阻碍水道竝
酌議查禁緣由恭摺覆

奏仰祈

聖鑒事竊前欽奉

上諭據給事中邵正笏奏江洲漲灘佔墾日甚請飭
查酌辦以弭水患而衛民生一摺本年江蘇安徽
江西湖廣等省水漫成災如果平日講求水利江
湖通暢何至釀成水患積久未消如該給事中所
稱近年長江一帶沙洲日增多被居民佔墾以致

阻遏水道且地方官所報陞科者不過十之二三而豪強之兼并奸蠹之侵蝕者不知凡幾自應將積弊悉除以收實效著陶澍等各飭所屬於瀕臨江湖地方詳細履勘如有沙洲地畝實在無碍水道者方准居民認墾毋得任令豪強勾通奸蠹霸佔以多報少而無力貧民轉致向隅仍無裨益其有壅遏水道之處必當設法查禁使漲水得資宣洩則害除而利興該督撫等當認真妥辦固不可以空言塞責亦不可任令地方官假手吏胥乘機舞弊以致利不能興害不能除百姓轉受其騷擾

殊失弭患衛民之意着將該給事中原摺抄寄該督撫等閱看酌議具奏等因欽此當經剴飭藩司欽遵遴委妥員履勘籌辦去後臣伏查兩江地方設省以江爲名江水自四川至湖北境內南會洞庭北會漢沔而來至江西又南納鄱湖之水至安徽又北納巢湖之水奔騰浩瀚經江揚鎮常通太各境以入海誠如該給事中所云天下之大利所在也而江蘇各境又南有吳淞婁湖之三江北有黃淮沂泗之四水皆與江水各別而各由江蘇境以入海故言水利於東南尤

爲第一大端黃淮爲漕運所經沂泗以濟中運
特歸河臣管理吳淞於蘇松各郡農田最關緊
要經臣於巡撫任內設法籌濬數年以來水旱
藉資洩蓄餘如常州之孟瀆鎮江之練湖以及
白泲婁江並經臣籌度多年或因籌款而未舉
或已舉而尙未蕆事仍當次第辦理至於長江
一帶沙渚縱橫淤成洲地沿海沿河俱皆有之
總因江南地方近海衆水所趨故洲灘尤多也
其間有年久陞科者有甫經陞科尙未成熟者
並有洲未成而望影陞科有洲已坍而畱糧待

補者爭長競短控訟無休不特阻碍水道抑且把持械鬥屢釀重案實爲洲棍惡習臣於道光八年九月內曾經另議章程詳悉

奏明除崇明一縣四面環海有沙無田課額仍循其舊此外各屬凡遇沙洲坍沒均令地方官隨時勘明詳咨豁賦不在畱糧待補如有新漲洲地無論子母相生江心突漲一概歸官勘明定額招佃納租解司充課以餘息爲地方水利津貼經部議覆奉

旨依議欽此嗣是械鬥爭洲之風頓息而洲旣歸官

亦不致私墾碍公至上年水災之重實因自夏徂秋苦雨連綿各省同時水發江省地處下游兼以湖河並漲宣洩不及非由江洲壅遏且江洲之生亦實因上游川陝滇黔等省開墾太多無業游民到處伐山刊木種植雜糧一遇暴雨土石隨流而下以致停淤接漲此等謀食窮民旣難禁其生計而開墾旣多傾卸愈甚及至沙漲爲洲則除去更難尋常一渠一壩動輒需費萬計况於長江數千里何從施工出土更何從籌此鉅款以爲經費是該給事中摺內所稱挑

空漲沙剷除塘壩以爲逐漸施工地步者似可不必以免滋擾惟私種蘆葦一節及豪強壟佔等情難保非事理所有自應逐細確勘嚴禁以期水道無阻茲據江寧蘇州兩藩司委員會同州廳縣場各員勘明各屬濱江臨湖傍河沿海凡有沙洲地方其已經成熟者均係按則完課並無私佔自道光八年以後新漲沙洲循照奏定章程分別歸公佃租多係種植菜麥棉花等物其產植蘆葦之洲甚少應隨時剷除禁種此時實無阻遏水道之處且沙洲旣已歸公豪強

蠹猾亦難侵隱是以勾串霸墾之弊亦除惟疏通水利攸關弭患衛民誠恐日久懈生或致奸民私行圍築不可不防其漸臣與撫臣現復飭飭各地方官嗣後每年於冬令水涸之時親詣濱臨江海河湖處所周歷查看一次如有新漲無碍水道者方准遵照新例歸公招佃陞科有碍水道者卽行督令刨除淨盡以順水性具結送司呈送備查倘有沙地阻碍水道及隱匿佔種情弊一經查出卽將佔種之人嚴行治罪並將地方官據實查叅如此則牟利奸徒知所畏

忌而地方有司亦知自顧考成以期水利民生
兩有裨益除江西安徽兩省洲地情形已由各
撫臣議覆外所有江寧蘇州各屬沙地無碍水
道暨酌議查辦緣由謹會同江蘇巡撫臣林則
徐合詞恭摺覆

奏伏乞

皇上聖鑒訓示謹

奏

道光十二年十一月初四日具

奏十一月二十八日奉到

硃批另有旨欽此同日奉到十一月十七日內閣奉
上諭前據給事中邵正笏奏江湖漲灘占墾日甚請
飭查辦當降旨令該督等酌議具奏茲據陶澍等
勘明各屬沙洲情形酌議覆奏疏通水利攸關弭
患衛民江蘇各屬沙洲地方自道光八年經該省
奏定章程後新漲沙洲均已分別歸公佃租及隨
時剷除禁種既無阻遏水道之處亦無侵隱霸墾
之弊惟日久懈生或致奸民私行圍築不可不防
其漸該督撫等卽嚴飭各地方官嗣後每年於冬
令水涸之時親詣濱臨江海河湖處所周歷查看

如有新漲無碍水道者方准照例歸公召佃墾科
其有碍水道者概行督令刨除淨盡並勒令具結
送司轉呈備查倘查有沙地阻碍水道及隱匿佔
種情弊除將佔種之人嚴行治罪外並將該地方
官據實查叅毋稍寬縱總期有司實力奉行奸徒
知所畏忌庶於水利民生兩有裨益欽此

續獲乞隄要犯解浦審辦摺片

再桃源乞隄一案拏獲在逃要犯陳堂卽生員
陳鎔併陳欽及該犯等供出姓名續行拏獲之
范洪起等十名均經先後附片

奏明在案臣陶澍於十月二十八日趕程到浦尙
書穆彰阿於十一月初三日遵

旨前赴湖北查辦事件業奉

欽派尙書朱士彦侍郎敬徵會同臣陶澍提集全案

將部駁各情逐款研究現在朱士彦敬徵均已
到浦伏查此案先經拏獲要犯張開太趙步堂

海東樓等卽突出首犯陳端要犯陳堂陳光南
陳欽今陳堂陳欽雖已獲案而陳端陳光南未
獲臣陶澍臣林則徐疊經分派員弁併督屬購
線四路偵捕茲據揚州府知府王青蓮稟派丁
役帶同淮安府桃源縣跟線與江都縣丁役踰
踪查拏於十月三十日在江都揚子橋地方湖
南幫船上將該犯陳光南陳鳳台同各營縣兵
役及揚州搜鹽委員會同拏獲訊據陳光南供
陳鳳台係伊胞叔陳鳳台供陳光南係胞姪俱
聽從陳端糾約空隄放淤屬實因聞拏嚴緊同

逃在湖南三幫船上幫拉短緯等語又據署桃源縣知縣徐麟趾報獲陳欽供出之龔海結一名均經解浦投訊前來除分飭押解來浦會同研訊定擬並再勒緝首犯陳端務獲解究不任稍有疎縱外謹將拏獲要犯陳光南陳鳳台等飭解審辦緣由附片具陳伏乞

聖鑒謹

奏

道光十二年十一月初四日附

奏十一月二十八日奉到

硃批另有旨欽此同日奉到十一月十七日內閣奉
上諭陶澍等奏挈獲挖堤要犯陳光南等解浦審辦
等語江蘇桃源縣奸民挖堤一案節經降旨令陶
澍等嚴緝要犯務獲究辦茲據該督等奏現將要
犯陳光南陳鳳台緝獲並挈獲陳欽供出之龔海
結一犯俱着迅速解至清江浦交朱士彥等會同
陶澍嚴訊惟陳端係挖堤首犯迄今尙未弋獲着
該督等嚴飭各員弁勒限偵緝務獲歸案審辦毋
再遲延致干重咎欽此

緝獲護私抽費逃犯飭審摺片

再本年江廣回空軍船經漕

臣

遴選幹弁沿途

查禁私鹽不許顆粒夾帶

臣

陶澍復於揚關一

帶委員逐船搜查併因蘇松常鎮等屬例食浙
鹽亦恐有回空夾帶未便稍分畛域一例挨船
嚴搜均屬爭盡並無偷載似漕船帶私之弊已
可肅清惟儀徵老虎涇地方舟航叢雜最易藏
奸緝捕稍鬆則梟匪乘機興販爲害鹺綱前有
蔣四長子卽蔣來山潛匿在彼護私抽費經

臣密派員弁拏護審辦

奏明發遣在案嗣

臣

訪聞該犯復又逃回藏匿該

處仍圖糾匪販私

臣

於道赴清江浦時面諭京

口水師副將田松林不動聲色密查嚴緝去後

茲據該副將稟稱帶同右營遊擊糜延慶署守

備劉長清及弁委兵丁等跟踪圍拏署守備劉

長清等認明該犯座船首先跳上船頭該犯蔣

四長子驚起赤身持刀從艙內跳出被官兵將

刀打落卽時擒獲高資奇兵等營縣兵役各駕

船來協獲等情除委兩淮鹽運司督同府縣提

訊嚴辦另行具

奏外又據甘泉縣知縣鍾承露稟報帶同宿遷縣
丁役等拏獲行劫浙江差弁高泰滄案內正犯
史盤五查此案前經拏獲顧大茗史安五顏全
池等三名茲正犯就獲卽由臣林則徐飭司提
省審結合併附片具陳伏乞

聖鑒謹

奏

道光十二年十一月初四日具

奏十一月二十八日奉到

硃批好欽此